



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 9

Assamese kentener Parvin
Covid-19 ajanga asü

Actor Bikramjeet Covid-
19 agi asü



VOL. XVIII NO. 197 (ADOK 197) DIMAPUR AMUNGNÜ (SUNDAY) MONUPII (MAY) 02, 2021 ₹ 5.00

Nagaland Governor-i Moatsü salem abener

Dimapur, May 1 (TYO): Nagaland Governor R.N Ravi-i Aortem den Moatsü salem lemsatepogo.

"Moatsü ya alu nung metsü yokba sülen amonger. Alu mapa inyakba, arem rongdokba, metsü prokba aser kiojen yanglushiba sülen iba benjung ajanga nübertem anisingzükdaksür," ta Governor Ravi-i sangdong ka nung ashi.

Iba benjung mapang yimdaklirtemi kati ka ka den sempet lemsateper, medemer tasen

yimteper, chi chiyunga lemsateper. Moatsü ajanga lokti akangshidaksür aser iba benjung nungsa lanurtemi akhidang nungi inyaka sobaliba angazüker, ta paisa ashi.

"Iba benjung ya COVID-19 inyakyim bentshia mongdi. Iba benjung mapang nenok ajak nem anema aliba taküm, yimjung aser tepela bentsür arung ta moatsür. Tsüingremi Nagaland moajangma" ta Governor Ravi-isa metetdaksü.

Hongkong Market nung dokan 33% dang lapoktsü

Dimapur, May 1 (TYO): Dimapur Deputy Commissioner-i Hongkong Market nung dokan 33% dang lapoktsü tetuyuba agütsüba ama Hazi Park Business Welfare Committee-i SOPs tasen kar benokogo.

Hongkong Market temalen aliba dokantem odd-even inyakyim nung lapoker aser telungen aliba dokantem anogo melentepa külenlen dang lapoktsü, ta Hazi Park Business Welfare Committee-i sangdong ka nung metetdaksüogo.

Dokan kibur ajaki Deputy Commissioner indang tetuyuba sülen anidaksüla aser Covid-19 aziuoktsü atema dokan 33% dang lapoktsüla. Dokan kiburtemisa tepila ayutsüla, mask enoktsüla aser hand sanitizers amshitsüla, ta parnokisa ashi.

Linük nung Covid-19 kanga putetba ajanga tensa tamajungba küma aoer, anungji Dimapur nunga asenoki iba wara aziuoktsü atema inyakyim akangakanga bentshia, ta HPBWC-isa metetdaksüogo.

Dimapur nung ki 2 shibangtsür

Dimapur, May 1, 2021 (TYO): Dimapur nung Nagaland Industrial Development Corporation Limited, Behind Hotel Saramati, Supermarket Complex Dimapur, House No. EWS-02/House No. EWS-03 aser NIT Campus, Chumukedima shibangtsür, ta

Dimapur Deputy Commissioner-i tanü metetdaksüogo.

Maneni, sorkari latetja aliba Holotoli School, Padumpukhuri, Dimapur mozü agi merüketogo anungji tanü nungi lapoktsü temelaba agütsür, ta Dimapur DC-isa ashi.

Bank temi ATM anepalutsüla: CNCCI

Dimapur, May 1 (TYO): Nagaland nung automated teller machine (ATM) booth nung SOP mamshiba atema aoksar aser bank temi Covid wara atema meblemetsür ta Confederation of Nagaland Chamber of Commerce and Industry (CNCCI)-i metetdaksü.

Külen, ATM aika mapa meinyaker, kishi mali, power backup mali aser timba ka nung sen mali, ta parnokisa ashi.

Maneni, ATM booth aika nung sali metsü, natzü anaba aser jana endoka aliba angur anungji public-ia yimya tajung bentshia

mepishir. Talisa ATM booth telungi nisung ka dang aitsüla aser nisung o nisung tsüingda tepila ayutsüla, ta CNCCI-i metetdaksüogo.

Bank temi sanitizers amala ayutsüla, mapang shia mozü agi ATM machines merüktsüla, customer tsüingda tepila ayutsü atema inyakyim tenzüksüla aser sen peria ayutsü atema tetuyuba agütsür. Bank temi ATM amshiba atema customer dang nungi sen agir anungji kasaji anepalutsüla. Anogo asem tsüingda item inyakyim metenzükra okadak nungi teyari meshitsü ta CNCCI-isa metetdaksü.

Tanü ECI website nung votes azüingba live metetdaksütsü

New Delhi/Guwahati, May 1, 2021 (Agencies): Deobarnü state assembly pungu indang election aser ano state kar nung by-election agiba indang votes azüingba live metetdaksütsü ta Election Commission of India (ECI)-i metetdaksüogo.

ECI website <https://results.eci.gov.in> den ano Google Play Store o Apple App Store nung aliba mobile phone app Voter helpline nung osang metetdaksütsü, ta ECI-isa ashi.

"Assam, Kerala, Tamil Nadu, West Bengal, Puducherry indang General Elections aser ano state kar nung Bye-Elections indang osang May 2, 2021 anepdang 8:00 ako nungi angutsü" ta parnokisa sangdong ka nung ashi.

Election result ji ECI website nung sayutsü aser minute pungu shia osang agütsütsü.

Website aser mobile app nung counting station nungi returning officers-i osang agütsüba metetdaksütsü.

Parliamentary constituency aser assembly constituency indang tatabangba osang jibo Form 20 nung dang lemsatepsü, ta ECI-i metetdaksüogo.

Guwahati city police-i Deobarnü vote azüingba mapang Kamrup (Metro) district nung nisungtem adenshitsü mesüra takok ngur benjungtepba memelatsü ta metetdaksüogo.

"COVID-19 wara nung ajemdaker aser ano result adokba sülen telok balala tsüingda raratepsü akok ta ajitetba agi tenokdangba agütsür. Iba ya Section 144 CrPC kübok lir," ta Commissioner of Police, Munna Prasad Gupta-isa ashi.

Mon kübok Wanching nung rü tsüka yipru ait NE nung taruba anogo 5 tzüinglu kanga arutsü

Guwahati, May 1, 2021 (Agencies): Honibar anüingdang Nagaland nung Mon district kübok Wanching nung rü tsüka yipru tulu ka süiogo.

Ajisüaka, iba lendong nung nisung yiruyibongba mesüra teraksa anguba osang kecha mali.

Nagaland dena Northeast state tem nung mopung ona rü tsüksü ta India Meteorological Department-i taoba mapang metetdaksa liasü.

Tanü Shillong aser Meghalaya kübok tanga tesemtem nunga rü tsüka tzüinglu aruogo.

IMD-isa taruba anogo 5 tashi Northeast nung yipru süitsü aser mopung tashii aontsü asadantetba osang metetdaksüogo.

May 1 nü Assam aser Meghalaya kübok tesem kar nung yipru den tzüinglu arutsü aser mopung (40-50 KMPH) aontsü ta IMD-i kümdangtsü osang metetdaksa liasü.

IMD-isa Nagaland, Manipur, Mizoram aser Tripura aser ano Arunachal Pradesh kübok tesem kar nung tsüingmok atena tzüinglu aruba den mopung (30-40 KMPH) aontsü shiogo.



Mon district kübok Wanching nung rü tsüka aliba noksa nung angur. (Facebook)

May 2: Assam, Meghalaya, Nagaland, Manipur, Mizoram aser Tripura kübok tesem kar nung tsüingmok atena tzüinglu arutsü aser mopung (40-50 KMPH) aontsü. Arunachal Pradesh nung tsüingmok atena tzüinglu arutsü aser Assam o Meghalaya nunga tzüinglu tulu arutsü.

May 3: Nagaland, Manipur, Mizoram aser Tripura kübok tesem kar nung tsüingmok atena tzüinglu arutsü aser mopung (30-

40 KMPH) tesashi aontsü. Maneni, Arunachal Pradesh, Assam aser Meghalaya nunga tzüinglu kanga arutsü.

May 4: Arunachal Pradesh, Assam, Meghalaya, Nagaland, Manipur, Mizoram aser Tripura nung tsüingmok atena tzüinglu arutsü.

May 5: Arunachal Pradesh, Assam, Meghalaya, Nagaland, Manipur, Mizoram aser Tripura nung tsüingmok atena tzüinglu arutsü.

CM Rio-i Mithun Bull Mother Farm lapoktsü

Dimapur, May 1, 2021 (TYO): May 1, 2021 nü Puliebadze nung Chief Minister Neiphu Rio-i Mithun Bull Mother Farm ka lapoktsüogo.

Iba ya Department of Veterinary & Animal Husbandry kübok Nagaland Livestock Development Board ajanga lapok.

"Naga nungger atema Mithun ya kanga tongtipang aser iba ya state indang maitsü lir. Alemli nungi Mithun ya Naga nungger atema akhüm ka ama amshia arur anungji Mithun metsüba wazüka ayutsüla" ta tanü CM Rio-isa ashi.

Mithun metsütsü atema arem tulu nungdaker aser Kohima district kübok arem tulutibaji

Jotsoma community reserved forest asü nung iba project model ya tenzüker. Iba ya centrally sponsored scheme (Rashtriya Gokul Mission) lir, ta paisa metetdaksü.

Kijatem dang nungi NLDB-i Mithun tem alizük aser Jotsoma Village council ket nung agütsü. Jotsoma village council-i sorkari ashiba agizükba atema kanga pelar aser iba ajanga yim aser sorkar tsüingda temolung lemtep adokogo, ta Rio-isa ashi.

Veterinary department aser Village Council-i arem nem timtem magütsüi tajangzük angutsüla. Asenoki Mithun wazüka ayutsüla aser timba kümdaktsütsü ayongzük, ta

paisa shisem.

Sentong nung Managing Director NLDB, Dr. Neikeyielie Theunuo-i o jembidang Jotsoma nung Mithun Bull Mother Farm ya reserve forest wazüka ayutsü indang model ka ama tenzüker ta ashi.

Mithun metsüba ajanga sen ajangzükba dak alia arem wazüka ayur aser morok mi azioker, ta paisa ashi.

Iba farm nung mithun 100 ser timba ayutsü atema mithun shed ana yanglua lir aser mithun boys ana atema attendant barrack lir. Iba farm nungsa research & training atema office cum training centre yangluloka lir, ta Dr. Neikeyielie-isa metetdaksü.

COVID-19 Nagaland: Nisung 158 dak putet; 3 asü

Kohima, May 1, 2021 (TYO): Honibarnü Nagaland nung nisung 158 dak COVID-19 aliba putet aser parnok züingsema nisung ajak agi 14,134 kümogo.

"Tanü nisung 158 dak COVID-19 putet. Parnokji Dimapur nung nisung 110, Kohima nung 39, Mokokchung nung 6 aser Longleng, Mon o Wokha nung kaka (1) lir. Külen, nisung 44 taneptsü nguogo. Parnokji Kohima nung 34, Dimapur nung 9 aser Mokokchung nung 1 lir" ta Health & Family Welfare Minister, S Pangnyu-i metetdaksü.

Nisung 14,134 rongnungi 12,268 taneptsü nguogo aser tang 1,353 anepaludar, ta paisa ashi.

Nagaland nung COVID-19 nungi taneptsü angur 86.80%

dang kümogo, ta State Nodal Officer for Integrated Disease Surveillance Programme, Dr Nyanthung Kikon-isa ashi.

"Tang anepalurtem rongnung parnok 113 dak shirangba yimya terara lir, 48 oxygen agidar, ka kanga mejungi lir aser ana ventilator nung lir. Nisung 1,189 dakbo shirangba yimya mali" ta Dr Kikon-isa metetdaksü.

COVID-19 puteta alir nisung 3 asüba ajanga tasür ajak agi 107 kümogo saka parnok rongnung nisung 10 bo tanga timtem ajanga asü. Tanü Dimapur nung nisung 2 aser Mon nung 1 asü. Nisung 406 tashi tanga state temi ogo, ta paisa ashi.

Nagaland nung COVID-19 alitsü akok ta temolung melemi bilemba sample 1,47,577

tendangogo. RT-PCR ajanga 79,090, TrueNat ajanga 38,264 aser Rapid Antigen Test ajanga 30,223 tendang, ta Dr Kikon-isa metetdaksü.

Hokolbar tashi nung Nagaland nung nisung 1,64,129 nem COVID-19 vaccine indang dose 2,06,014 agütsüogo, ta State Immunization Officer Dr Ritu Thurr-isa metetdaksü.

Vaccine agirtem rongnung frontline workers 40,284, healthcare workers 14,755 aser arishi küm 45 ser tempur 99,090 lir, ta paisa ashi.

Parnok rongnungi nisung 41,885-i dose anaprong agiogo. Parnokji front-line workers 24,434, healthcare workers 9,721 aser arishi küm 45 ser tempur 7,730 lir, ta Dr Thurr-isa metetdaksü.

Dy.CM-i Tsuyi & Tsui yong nung apu lapoktsüogo



Deputy Chief Minister & NPWD (Road & Bridges) Minister incharge Y Patton-i May 1 nü Zunheboto district kübok Tsuyi aser Tsui ayong nung RCC T-Beam apu lapoktsüba noksa nung angur.

Dimapur, Monupii/May 1 (TYO): Deputy Chief Minister & NPWD (Road & Bridges) Minister incharge Y Patton-i May 1 nü Zunheboto district kübok Tsuyi aser Tsui ayong nung RCC T-Beam apu lapoktsüogo. Apu lapoktsüba sentong ya Chief Engineer (Road and Bridges) Office, NPWD Kohima conference hall nung virtually agia liasü.

Sentong nung o jembiba mapang Patton-i, apu ana indang project ya Govt. of India, Ministry of Road Transport and Highways-i Economic Importance scheme kübok 2017 küm sanction asü aser 2018 küm December ita nungi mapa tenzük, ta ashi. Paisa, 2020 küm COVID-19 wara pokteta state ajunga mokdanga ayutsüsa akümba ajanga apu tera menor yangluzük ta ashi.

Deputy CM-i, apu anaprongla ya yimtsü aika atema taküm liyonga aotsü asoshi tongtibang aser iba ajanga district headquarter den sendaktepdaktsür ta ashiba den apu anaprongla yangluzükba ajanga iba tesem nung alirtem shishilmba balala ajanga rongsenketsüng nung ajangzüksü ta ashi.

Maneni pai, Tsuyi apu ya Pughoboto-Asukiqa lenmang nung lir aser iba ajanga Natsumi, Asukiqa, Ghokimi, Kitami, Tsaphimi aser Puneboqa

yimtsüng nung alirtem sendaktepdaktsür aser Tsui apu ya Kijumetouma nungi Ghathashi aoba lenmang nung lir, koba Ghathashi, Iphonumi, Mukalimi aser Hebolimi ajanga süier, ta ashi.

Minister incharge-isa, apu yangluba mapang item tesem nung aliba yimdaklirtemi teka amteper inyakba atema aser apu ana yangluba contractor; M/s Vertex Constructions aser M/s Multi Builders nati apu takok nung tembanga yanglutsüba atema parnok nem tenüngsang agütsü.

Maneni Patton-i, iba tesem nung lenmang infrastructure ajungketsü atema MLA Y. Vikheho Swu-i kanga nendaka inyakba atema pa danga kanga pelaba lemsatep.

Virtual video conference agiba mapang Y. Vikheho Swu, MLA-ia, COVID-19 wara pokteter timtem nung liaka apu mapang shidak nung tembanga yanglutsü atema deputy Chief Minister dang kanga pelaba lemsatep. Paisa, iba apu ajanga temeket nung aliba yimtsüngtem aser state ajunga ajangzüksü, ta ashi.

Virtual conference sentong ya Principal Secretary Works and Housing NPWD lenisüba nung agi aser NPWD, chief engineer office (Road and Bridges) nung technical report

agüja liasü.

Tsuyi apu ya Pughoboto-Asukiqa lenmang nung lir aser iba ajanga Natsumi, Asukiqa, Ghokimi, Kitami, Tsaphimi aser Puneboqa yimtsüng nung alirtem nem tesendaktep tajung agütsür. Iba apu atema 2017 küm August ita sen crore 6.38 sanction asü aser M/s Vertex Construction-i contract agizüker 01.12.2018 nungi mapa tenzük aser 30.03.2021 nü tembanga inyak.

Kasa mapang nung Ghathashi aser Hebolimi lenmang nung Tsui ayong (21m span) nung RCC apu ya Economic Importance (EI) kübok yanglu.

Tsui apu ya Kijumetouma nungi Ghathashi-i aoba lenmang nung lir, koba Ghathashi, Iphonumi, Mukalimi aser Hebolimi ajanga süier aser Kohima o Chozuba den sendakteper. Tsui ayong nung teti atema apu ka yanglua maliasü aser iba ajanga tzüngluruwa nung timtem aika ajangshia aruogo. Lenmang kanga tongtibang ta angateta iba apu yanglutsü atema benok.

Tsui ayong nung apu yanglutsü atema 2017 küm August ita sen crore 6.90 sanction asü aser M/S Multi Builders-i, 01.12 2018 nungi yanglu tenzük aser 28.03.2021 nü tembanga yangluogo.

Changtongya yimtsüng nung Sanitary Pad Production Unit lapokogo



Dimapur, Monupii/May 1 (TYO): Changtongya yimtsüng nung May 1 nü MLA Imnatiba Advisor, Industries & Commerce, Labour & Employment, Skill Development & Entrepreneurship-i, Sanitary Pad Production Unit' ka lapoktsüogo.

Sanitary Pad Production

Unit' lapokba sentong nung Changtongya yimtsüng Council züngsemtem, Mokochung nungi NABARD ketdangsürtem, NSRLM Mokochung District aser Block staff aser NSRLM Changtongya Block kübok SHG züngsemtem dena liasü.

Sentong nung o jembiba

mapang MLA Imnatiba-i, iba inyakim tajung benoka inyakba atema NABARD aser NSRLM BMMU Changtongya dang kanga pelaba lemsatep. Paisa, iba project takok ngua inyakyonga aotsü atema supporting agencies tem dang maneni teyari agütsütsü ayongzükba den project renloka aoba indang mapang shia Administration nem metetdaktsütsü metetdaktsü. Maneni pai iba project takok nung inyakyonga aotsü atema takok tashi teyari agütsütsü nangzüka liasü.

Temetetsükaji Sanitary Pad Production Unit ya NABARD-i parnok indang project; Livelihood and Enterprise Development Programme (LEDP) ajanga Warotzubu SHG (NSRLM Changtongya Block kübok) nem agütsü aser NABFOUNDATION - "MY PAD MY RIGHT" project-i achaayanga inyaka liasü.

Kohima nung nisung 14 dak Covid putet

Dimapur, Monupii/May 1 (TYO): Kohima District Task Force (DTF)-i achaayanga nisung mashika nungi sample agizüka tendangba sülen sample 57 rongnungi 14 dak Covid-19 tashidak keta aliba putetogo. Iba osang ya Chief Medical Officer Kohima, Dr. Vezokholu Theyo-i April 30 nü

metetdakja liasü. Kohima nung alirtem dak covid mesen keta ali mali tendangtsü atema iba sentong ya AG colony, Para-Medical aser Ministers' Hill Kohima nung April 28 aser 29 nü ayongzüka agi, kong nisung mashi ka nungi sample agizüka tashidak tendanga liasü.

NSCN/GPRN (R) aser DY.CM-i Moatsü salem lemsatep

Dimapur, Monupii/May 1 (TYO): NSCN/GPRN (Reformation)-i Aoer tem den Moatsü benjung salem lemsatepogo, koba kümshia May 1 nungi 3 tashi amunger.

Moatsü mesera Moatsü Mong ya Aoertem atema tongtibang benjung ka lir. Moatsü ya alu nung metsüjangnatsü yokseper külen temoatsü meshizüka amungba benjung ka lir. Benjung mapang tetsür teburtem ajak sobaliba sobotsü semer ken tena aser tsüngsanga amunger.

Iba benjung ajanga Aoertem nem temoatsü aser yimjiyimjung bener arujang, ajita asünungdang parnoki maneni lenla balala nung tongpuapur inyaktsü aser mezüngpur sütettsü aser Naga nungertem mulung nung khuret abentsü atema tanüla ka inoktsütettsü, ta NSCN/GPRN (R) MIP sangdong ka ajanga

lemsatep. Kasa mapang nung Dy.CM Y Patton-ia Aoertem den Moatsü benjung salem lemsatepogo. Patton-i, taküm iba benjung mamungtsü atema lenirtemi asatetba atema parnok nem tenüngsang agütsü, kechiyong lokti tulu adenshia benjung amungba ajanga wara pokteter aliba mapang tashidak tali prokshia odaktsütsü ana nung lir, ta ashi.

Ajisiüaka pai, nüburtem dang benjung ya pei mulung nung ayutsü aser pei kidang tetsüteboutem nem akhümetetushi agütsütsü mepeshia metetdaktsü. Maneni BJP legislators tem tenüng nung Dy.CM-i Moatsü benjung salem lemsatepba den temoatsü molamoshia agizüksü atema sarasademja ataba, Dy.CMO Media Cell sangdong ka ajanga metetdaktsü.

S&WC department Registrar den tepila sentong agiogo



Dimapur, Monupii/May 1 (TYO): Department of Soil & Water Conservation-i achaayanga April 30 nü Registrar Zasevituo Theünuo den tepila sentong agiogo. Iba sentong ya Soil & Water Conservation Directorate Conference Hall nung agi liasü.

Superintendent, Hotoli Shikhu-i, Zasevituo-i jenjang balala nung department tenzükba indang tatsüka metetdaktsü aser iba sülen ketdangsür nem tepelaba temaitsü kuli kaket tajung agüja liasü.

Sentong nung o jembiba mapang Zasevituo Theünuo-i,

pa asoshi department-i sentong tajung ayongzüksüba atema kanga pelaba metetdaktsü aser iba den sorkar tenzükba mapang tajangshibatem indang tatsüka lemsatep.

Maneni sentong nung Director, S&WC-ia o tatsüka jembi. Registrar-i department atema bendanga agüja nendaka inyakba atema Director-i pa dang kanga pelaba lemsatep aser mapa nungi ananba sülen jangradema anisüngzüka alitsü imlaja ataba lemsatep.

Iba sentong ya Joint Director Lily Tep lenisüba nung agi aser Joint Director Denis Angai-i tepela anküp o jembiba liasü.

Tuensang ADC-i tetuyuba kar agütsü

Dimapur, Monupii/May 1 (TYO): Additional Deputy Commissioner & Administrator Tuensang Town Council (TTC), Tuensang, Ajit Kumar Verma, IAS-i, tawa Covid-19 tashidak tali potetyonga aoba aser April 30 nü Covid-19, District Task Force (DTF) senden nung lemtetba dak ajemdaker tetuyuba kar agütsüogo.

Tarutsü nung contact tracing atema nüngdaka kümra ta ser business establishment balala semdangba/customer tem indang osang tejangja ayutsü atema hotel, restaurant, lodge, bakery, wholesaler, general shop, hardware, kou mejepdak, beauty parlour aser tanga

business establishment tulutem ajak dang anogo shia tesemdangertem/customer tem indang osang tejangja mangaoaka ayutsü asoshi register kaka anepalua ayutsü tetuyuba agütsüogo.

Tetuyuba nung nisung tenüng, contact number, alternate contact number, address tejangja, dokani aruba mapang aser aoba mapang tejangja mangaoaka ayutsü tuyuogo. Iba tetuyuba sülen tashi anga manidakertem indang trade license agintsütsü aser temzüng ozüng kübok provision tapet dak ajemdaker temerenshi agütsütsü, ta kasa sangdong ajanga metetdaktsü.

Tripura nung double mutant strain ajanga nisung 1 asü

Agartala, May 1, 2021 (Agencies): Maharashtra nung timtem agütsüba double mutant Indian variant ajanga Tripura nung nisung ka süogo.

Tripura nung SARS-CoV-2 kanga menatepa atema health ketdangsürtem aoksar. Parnoki ashiba agi tesüiba ghonda 24 tsüingda nisung 166 dak putetba nungi parnok 14 dak World Health Organisation (WHO)-i B1617 ta ajaba putetogo.

National Institute of Biomedical Genomics, Kalyani nung tendangtsü atema sample 19 yokba nungi 11 dak double mutant strain aliba ajitetogo.

Sample 19 nungi 5 ji UK variant aser ka South African variant ta putetogo.

"Doctor temi item variants ji VOC (Variant of concerns) ta agizükogo. Double mutant variant agi shiranger ka süogo" ta Tripura nung senior virologist Professor Tapan Majumder-i ashi.

"Item strains ya tanga linüktem nungi bener aruba lir. Anogoshia tensa tamajungba akümer anungji asenok kanga kümdangtsüla. Petsaprong masütsüla, asenoki iba virus madak takok angutsü atema inyakyim shitak benshütsüla" ta Majumder-isa ashi.

Osangbenertemi virus memenatsü atema kobala mask enoktsüla ta asüingdangdang "triple-layer masks enokang" ta Prof Majumder-i langzü.

Assamese kentener Parvin Covid-19 ajanga asü



Guwahati, May 1 (Agencies): Honibarnü Guwahati nung Assamese kentener Parvin Pori nija mozü ki ka nung Covid-19 ajanga asü.

GNRC Hospital nung anepalua arur la Honibarnep asü.

Anogo ishika tejakdang Parvin-i Guwahati nung Bihu sentong ka nung shilem agia liasü. Anogo ana

tejakdang la dak COVID-19 aliba putet.

Osang angazükba agi tebua Covid-19 dak sendakba timtem atema temang anepaludar.

Taoba mapang Assamese kentener Bhitali Das aser music director Vijayalakshmi Das naprong Covid-19 ajanga asü.

Manipur assembly constituency ajak nung Covid care committee tentettsü

Imphal, May 1 (Agencies): Manipur sorkari state kübok assembly constituency ajak nung Covid-19 care committee tentettsü telemteba agiogo.

Covid-19 care committee shiaji MLA kati ketdangtsütsü aser iba constituency nung alirtem ajaki SOPs sülen anidaktsü atema pa indang khuret asütsü.

Hokolbarnü Manipur chief minister N Biren Singh-i Imphal nung MLA ajak den COVID wara atema senden ka amen.

CM Biren Singh-isa health ketdangsürtem, tongti ketdangsürtem aser police den Manipur nung lockdown aser containment zones atema senden ka amen.

Meghalaya-i nisung lakh 15 nem vaccine agütsütsü atema Rs 90 crore nüngdaker

Shillong, May 1 (Agencies): Meghalaya nung arishi küm 18 nungi 45 tsüingda alir nem COVID-19 vaccine agütsütsü atema Rs 90 crore plus GST nüngdaksü ta chief minister Conrad K. Sangma-i ashi.

"Vaccine dose lakh 30 atema GST dena sorkari Rs 90 crore nüngdaksü. Ajisüaka iba sen endokba ajanga nübertem aser state ajunga atema yaritsü" ta CM Conrad-i metetdaksü.

"Senotsü peria maliba ajanga vaccine dose lakh 30 alitsübaaji tayongzükba tulu ka lir. Ajisüaka, iba mapa ya inyaksüla" ta paisa ashi.

Sorkari mozü yangluba company tem dang vaccine meshiogo. Ajisüaka Meghalaya dena linük ajungalen vaccine agi meperir aser iba jagi tanü nungi vaccine agütsüba maparen metenzükter, ta Conrad-isa metetdaksü.



Hokolbarnü Itanagar Capital Region (ICR) deputy commissioner Talo Potom-i Itanagar Municipal Corporation (IMC) nung corporators den rongdak senden ka ayonga amendang agiba noksa angur. Iba senden ya ICR nung Covid-19 azüoktsü atema amen aser Itanagar MLA Techu Kaso o IMC deputy mayor Biri Basang naprong aden.

ULFA-I lennir Jibon Moran police-i apu

Guwahati, May 1 (Agencies): ULFA-I tanishir Jibon Moran-i anogo asemnü tejakdang temai adok saka 2019 küm pa anema ken o ka benoka aliba nung ajemdaker police-i pa puogo.

Dibrugarh kübok Milan Nagar police outpost nung tax consultant Vikash Kumar Mishra dang Rs 20 lakh meshi ta tai tonglokja arishi küm 65 tain Moran anema ken o ka benoka lir.

Hokolbarnü Moran ya Dibrugarh District & Session judge court-i anir ao aser idangji pa police ket nung anogo 5 ayutsü temelaba agütsü.

Assam journalist ana COVID ajanga asü

Guwahati, May 1 (Agencies): Delhi nung amenoker mapa inyaker Assam journalist ana Covid-19 ajanga süogo.

Journalist Anirban Bora-i New Delhi nung The Economic Times atema graphic editor ka ama inyaka liasü aser pa Honibarnü mozü ki ka nung asü.

Arishi küm 42 tain Bora-i pa kinungtsü aser jabaso ka toktsür alima nungi pilaogo.

Külen, Honibarnep senior Assamese journalist Kalyan Baruah Covid-19 ajanga asü. Baruah ya The Assam Tribune atema New Delhi bureau chief

ama inyaka liasü aser nija mozü ki ka nung asü.

Pa kinungtsü Nilakshi Bhattacharyya - a i Brihostibarnü COVID-19 ajanga asü.

April 2020 nungi tenzüker April 28, 2021 tashi nung India nung COVID-19 ajanga journalist 101 tashi süogo.

Tasürtem rongnung parnok 52 tashi April 2021 nung dang asü, ta Delhi nung amenoka aliba Institute of Perception Studies-i metetdaksüogo.

January, 2021 nungi journalist 50 tema COVID dak sendakba timtem balala ajanga süogo.

Asür Sumila atema motorcycle rally ayonga agi



Diphu, May 1 (Agencies): Honibarnü Allied Royal Riders of Karbi Anglong (ARRKA)-i arishi küm 12 tain Sumila Ronghangpi nem temeten meshia 'Ride for Justice' motorcycle rally ka ayonga agiogo.

Iba rally nung nisung noklang aikati yaritep aser parnoki temeten meshiba den aibelenertem tasüba agi merenshütsü aser takoksa angur kibong nem teyari agütsütsü takhangbatem

agütsüogo. "Onok Diphu nung motorcycle group ka nung dena lir aser ARRKA-i asür Sumila Ronghangpi asoshi temeten meshiba rally nung shilem agir" ta nisung kati ashi.

April 22 nü Nagaon district kübok retired bank employee Prakash Chandra Borthakur aser par jabaso Nayan Jyoti Borthakur nati Sumila Ronghangpi reshikangshi, tashiyim agi shi nung medem aser mi agi

rongset. Sumila Ronghangpi ya par kidang kilir ama inyaka liasü aser osang angazükba agi la West Karbi Anglong district kübok Kudam Ronghang Arong nung lar kidangi onüa liasü.

Iba lendong atalokba sülen police-i Borthakur aser pa jabaso na puogo aser lisopur teloktem den social activist temi tena nem tasüba temerenshi agütsütsü akhanger.



TIR YIMYIM

YIMOBILEM (EDITORIAL)

DIMAPUR AMUNGNÜ, MONUPII (MAY) 02, 2021

Asenok ya alima tesangwa

Tammang ya tashidak ka asünunga, iba tashidak aneptsü asoshi mozü ka dang lir aser iba mozüji tesangwa lir. Tesangwa agi tammang sangwadaktsübaji kecha dena aibelentsü makok aser medemdangtsüa makok. Tesangwa aru meteteteta tammang jena oadoker. Aji oda, tammang nung alirtem asoshi rongdak nungdak tulutibaji tesangwa ya lir. Iba tesangwaji na lir ta Yisui Mathi tapu 5:14 nung shia angutsü. Tetezü, Tsüngremi asenok nem jatsüba tenüngji Tesangwa lir aser Pai asen nem inyaksü agütsüba mapaji amhang bushia oagi sangwadaktsübaji lir. Ajisüaka, anü sangwa agidang ita aser alima sangwa ama, asenoka asenoksasa mesangwatet saka Tsüngrem dak aliba tashi aser tesangwa agidang asenoka sangwatsü. Iba jagi David-ia T.Ken 84:11 nung "Kibuba Tsüngremji anü" ta shia angutsü. Aji oda, Kibubai Pa dak aliba iba tesangwa tashi jagi asenok taküma sünga lidaktsüner. Tesangwa yabo miima yutetla oset ka masü, anungji kodang anü adokdir ajaki angur aser meteter. Iba kasaji kodang asenok dak Kibuba tesangwaji lidir, ajaki angutsü aser metettsü. Iba jagiang Yisui kasa Mathi 5:16 nung ashir, " nisungi nenok mapa tajung ngua , kotak nung aliba nenok tebu sentsüwangshidaktsütsü asoshi, parnok madang nenok tesangwaji yalokjang." Iba amaji na anasa mesüra nü den alirtemi meteteteta nü dak aliba tesangwa jagi parnok taküm aser kibong sangwatsüa, Tsüngremi nü nem agütsüba tesangwaji jungkai adoka amshidaktsüner. Atangji, tanü asenoki asen meketa alima tensa repringdangra, alima yimten tia dang masü saka Covid-19 ama tashidak wara tamajung tulu agi alima tensa mapang tammangba tammangba akümba angur. Item tensa tia jagi nisungtem mulungjang kanga shimaka lir. Meimlaika kibong aika nung mangyim jashi tia ajurua lir aser kibong aika temulungjang tammang agi sünger pelanüaka mepelatet shisabolua aser terata agi sünger lir. Parnok asoshijibo joko anüa kodanga madoktsü amai bilema temulungjang mangmanga lir. Ajisüaka, asenoki tamangjisa aija kazü nung majungtsü, kechiyong nisungtem mulungjang mangmanga akümtsüa inyakbaji tammang mapaji lir, anungji tammangbo pa teinyaksü tim inyaker. Aji oda, manga akümbaji tammang tai aser tamakok masü saka tesangwa tai aser tamakok asütsü, kechiyong tamang akoktsübajibo tesangwa dang lir. Iba jagi shin o nunga ashir, " tammangsa aija kazüba dang nungibo tesangwa tilaka tsüklokba tajungba." Tetezü, asen meketa tangari meinyakba aser tangar tamakoksa aija kazüba dang nungibo, asenokia asenok akokba agi tajung tilaka asüyonga inyakra, iba jagi alimaji sangwa tenzütsü. Atangji, tammang mali nungbo tesangwa menüngdaker saka tammang aliba agi tesangwa nungdaker. Iba tesangwaji asenok lir. Iba tesangwa asen dak alibaji tangar metettsüa asenok mapa agi kuli asütsüla. Tsüngremibo asenok nem tammang ajak kokteta sangwa yaloktsütsüa tashi agüja lir ser nung, asenoki aji mamshitetra, ibaji milen tsükloker pongdang agi küpbanga ayu ama asütsü ta kasa Lai o nung shia aliba asenoki angur. Koba anogo nung asenoki Tsüngrem taochi agizük aser Yisu Khristaji pei taküm nung Kibur kümdaktsü, iba anogo nung jagi asenok Tesangwa chirtem kümogo ta 1 Tesalonika 5.5 nung shia angur. Iba kasa Lai tekong 6 nungji, "anungji tammang amaji asenok memejangli saka saksalema lidi," ta shia angur. Tetezü, tesangwa yabo kodanga yimbazüa malir, saka anisüngzüka melii amang aridokja senzür. Yisu alimai aruba indang sangdongba osangjia, " amang nung alirtemi tesangwa tuluka angu aser tasür lima aser tasüba akhüm nung mena alir dangi tesangwa adok," ta Mathi 4:16 nung shia angur. Aji oda, Yisu alima nung alidanga, Pa aolen ajak nung tasüba aser temenen talenba agi, tashidak agi aser alima ozüng agi alener tammang tia nung aliba purtem tia ajak salaja sangwatsü. Pa dak aliba tesangwa jagi amhang nung miima aliba anemsü aser temenen mapatem ajak jungkai adokdaksü, anungji nisungtemi tesangwa nung pei dak aliba temenen tesempatsütem ngua taidok nangzük aser taidok angu. Tesangwai amang aridokba mapatemji itemji lir. Iba kasa tesangwa tashi aser ainji asenok nem agüja lir. Iba jagiang, asen meketa aliba purtemi asenok ya Yisu dak amanger Pa nütsünga ta metettsüa asenok nem agütsüba tesangwa jagi amang nung aliba purtem taküm aser kibongji sangwadakjang ta ashir. Tesangwa mapaji tanga mapa kecha mali saka manga aliba tesemtem sangwadaktsübaji lir. Aji oda, tesangwa agidang menena aliba tesemtema sayur aser merüka aliba tesemtema jangjar. Iba tesangwaji asenok lir. Iba tesangwaji asen dak tangari ngua Tsüngrem temeim tali meteta Pa sentsüwangshidaktsütsüa asenok alir asü malir ta tanübo khen bilemdangdi. Tsüngremi agütsüba tesangwaji kodang asen dak lidir, asen anasai tammang marutettsü aser asen aolen ajak nung tammang jenadoktsü. Iba tesangwa tashi jagibo temenen tashi aser tashidak mesen ajak yangsaa odaktsür aser asen anasai marur, kechiyong asenji Tsüngrem chir, tesangwa lir.

OLEMSABANG

Sapua mejembiba "Tama" agi tenzüka ojang eshika

T. Meren Paul, Kohima.

(Yashi adok nungi...)

21. Tama+metet = Tamametet: Kecha memetetba nübo, mashi malu
22. Tama+-nakshi = Tamanakshi: Terongdong nung tekongnem küpok, tapu ana ajurutepdak anaknüa aiter saka teka agi matong manakshidak tesem
23. Tama+ngatsü = Tamangatsü: Mangashitsüla o, hai ta masütsü mapa, mangatsüla ken o
24. Tama+ngu = Tamangu: Meyimlaba lendon tulu, ajungben lendong ajuruba
25. Tama+-ngutsü = Tamangutsü: Mangutsüyim ngushiba, repringshiba, , temenen moijing anguba.
26. Tama+otsü = Tamaotsü: Maotsülen aoba/menüngdakba telok nung adenba
27. Tama+pok = Tamapok: Yong ayadang Au tanüklen ayazüba, yong tamapok
28. Tama+pung = Tamapung: Mit tema tejokjok saka yakta süngzüker, O memeyimshir
29. Tama+putsü = Tamaputsü: Arem nung sang sua ayuba nung majila shiru mesüra ozüsangnu shia/pua aliba
30. Tama+sar = Tamasar (har): Tangar dang tama yakta mapai apusor, alu tasener
31. Tama+sayitsü = Tamasayitsü: Masayatsüla, tim masüba yim agi asayadang yiruyupong adenba ,
32. Tama+sayu = Tamasayu: Mesayui ainba tanur, mesayu chir
33. Tama+sayutsü = Tamasayutsü: Tanurdang mesayutsüla yimya, o mesüra mapa tamajung inyaka, benshia sayuba
34. Tama+shi = Tamashi: Mebilemdangi telemtetba tai agiba mesüra mapa meshidak inyakba.
35. Tama+shi = Tamashi: Nai ashibaji tamamano, mamailiangmano ta o mesüba
36. Tama+shitsü = Tamashitsü: Endoka aliba meyamena aketba osettsüet shia marutsüla sünnung shia aruba
37. Tama+shitsü = Tamashitsü: Temang nung nguyangoko mesüra kumolongra tesem tamajung nung adoka rokrongba, ashiba
38. Tama+shitsü = Tamashitsü: Mangazüktsüla, mashitsüla tim masüba mapa angazükba/shizükba.
39. Tama+soettsü = Tamasoettsü: Memeteti, aibelena mesoettsüla soeta ayuba.
40. Tama+sotsü = Tamasotsü: Tanur meshidak saloksari sotetba,
41. Tama+sübotsü = Tamasubotsü: Süoshi tim masüba süboba, mesobütsü yim süboba, teburi tetsür teberemsü peteba ama
42. Tama+süngtsü = Tamasüngtsü: Tzübo nung tzü tamajung mesüra lishitzü agi sünga atsüngba.
43. Tama+sür = Tamasür: Arishir, küm aika mesüi takum aliba
44. Tama+sütsü = Tamasütsü: Nisung tasüba yimya nung masü saka lendongtsüdong nung menena tangar masüba yim agi asüba
45. Tama+sütsü = Tamasütsü: Meinyaktettsü mapa tulu inyakba, mesüra maksütsü agütba nüngkobentettsü mapa tangari minyakba mapa inyakba
46. Tama+temtsü +Tamatemtsü: Medemjentsü, tatem mazüi atemtsü
47. Tama+toktsü = Tamatoktsü: Kodanga tai matoktsü, tatok magütsütsü
48. Tama+yangshitsü = Tamayangshitsü: Tali tabong, alimela-a mang ayangba
49. Tama+yazü = Tamayazü: Yazüyapong maket, tsüngchiba, temolung lemetetba
50. Tama+yitsü = Tamayitsü: Teshimzük, mezüngoktsü, menüngdakba, maittsüla
51. Tama+yoktsü = Tamayoktsü: Teshimzük, teraksa jenjang maketba oset, tayoktsü majungba
52. Tama+yongtsü = Tamayongtsü: Amersu, sotzü, piya amala tamajung kumer raksaer aliba tayongtsü majung
53. Tama+yutsü = Tamayutsü: Kidang tashibangtsü oset tsüset mayutsüla ayuba ajanga manemshilu adalokba
54. Tama+züngtsü +Tamazüngtsü: Aibelena züngsemba, mazüngtsüla densema züngokba.
55. Tama+züngtsü = Tamazüngtsü: Alu nung metsüjang tamajung azüngba, alu ali den mapet tsünütsü yokba

Yamala ojang ni memetetba aika ano alitsü südi, temeteter karh-i ano yarisema adok nung ajungtsü. Arok Osep 2019 aser Original Clark Dictionary 1911 print nung anguba ojang karbo yangi amshia lir saka Tama agi tenzüka o teladakbo takok tashi mamshitsü merangdangogo. Ni phonetic formula mamshi zülur asünungji kasa spelling nung olasü (pronunciation) adokyim lanurtemibo shidak madoktettsüa akok saka tzürapurtemibo rateta züluba nungjagi olasüji shidak adoktettsü. Ao oshiji ojang ka nung karh nung tejaklen aser karh nung tesülen ta bendentepba agi tetetzü adoka ojang akumba timbaka nung angur. Tejaklen bendenlokba ojang kar, Nok tejaklen Par ta bendenlok nung Par+nok = parnok/... anak, asenok, benok, chubanok, enok, jenok, kenok, larnok, menok, monok, monoknok, noklangnok, onok, shirnok, teno.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Benue State nung Muslim nunger kiralongrartemi Khristan 33 tepset

JOS (Nigeria), May 01, 2021

(Agencies): April 26, 2021 aonung Muslim Fulani kiralongrartemi north-central Nigeria nung aliba refugee camp nung jenoka alir Khristan 10 tepset; ibaji densemabo hopta ka tsüingda Benue State nung kiralongrartemi Khristan 33 tashi tepsetogo, ta osang ka ajanga metetdaksü.

Kiralongrartemi amakba mapang jenbur Khristan kati, "Camp nung onok amakba mapang nung Khristan 10 tepset aser Khristan 9 yiru," ta metetdaksü.

Tamalena Fulani teloki Benue state yimtiba, Makurdi yimti tezülen aliba camp amakba mapang nung nisung 7,000 dak tema jenshia liasü, ta paisa metetdaksü.

Honibarnü (April 24) Benue state nungsa Fulani teloki Khristantem amakba mapang nung Khristan 17 tepseta liasü, ta iba area nungji legislator, David Iorhemba-i metetdaksü.

Fulani teloki anepongi 2:00 ako meta Yogbo-Mbayev, Ajimaku, Ayeri, Udei aser Tse-Gborigyo yimtsüngtem amak, ta

paisa metetdaksü.

April 21 nua Guma, Makurdi aser Agatu counties nung Fulani telokisa Khristan trok tepset, ta Guma Local Government Council osang ka ajanga metetdaksü.

Benue State Governor, Samuel Ortom-i Abagena nung aliba camp semdangba sülen item osangji jangjaogo, ta sorkar otongdar, Terver Akase-i metetdaksü.

"Tesem balala nung jenshia aliba Khristantem amakba atema Governor Ortom-i tebilemtsü akaba lemsatepogo. Iba mapa ya temenen tanelai amshiba nisungtemi inyaka ta pai aitsüogo," ta otongdarisa metetdaksü.

April ita tetenzüklena Benue State kübok Guma, Makurdi aser Gwer West areas nung Khristan aika tepseta liasü.

November 2019 nungi October 2020 tsüingda alima nung Khristan timtiba tepsetba linükji Nigeria lir aser Tenla kitem timba shibangdaksüba linüktem rongnung China sülen tanabuba jenjang nung Nigeria lir. Nigeria nung Boko Haram

aser ISWAP [Islamic State West Africa Province] nati asalentong yanglur inyakba ama Fulani Muslim telokia Khristantem anema asalentong yanglur inyaker.

Nigeria nung Khristan lenirtemi ashiba agi, Nigeria kübok Middle Belt nung parnoki Khristantem amakba nükjidongji Khristantem meyong ali rakzüka agitsü aser Islam nunger li kümdaksütsü atema lir.

Yaküm December 7 nü U.S. State Department-i Nigeria linük ya Countries of Particular Concern (CPC) nung züngokogo. CPC linüktem rongnung Burma, China, Eritrea, Iran, North Korea, Pakistan, Saudi Arabia, Tajikistan aser Turkmenistan densema lir.

U.S State Department-isa "Entities of Particular Concern" nung ISWAP, Boko Haram, Al-Shabaab, Al-Qaeda, Hayat Tahrir al-Sham, Houthis, ISIS, ISIS-Greater Sahara, Jamaat Nasr al-Islam wal Muslimin aser Taliban teloktem züngokogo.

Tan hopta piyong NMM-NBCC-i prayer week ayonga amonger

Kohima, May 01 (TYO): Nagaland nung Khristan yimsü arur küm 150 ajungtsü mapang ana nung lir; asen Naga limai Khrista osangtajung aruba sülen 2022 küm Sesquicentennial (küm 150) ajungba Jubilee amongtsü, ta Nagaland Baptist Church Council (NBCC) General Secretary, Rev. Dr. Zelhou Keyho-i sangdong ka ajanga metetdaksü.

"Asen limai Khristan yimsü marudangbo Naga nunger pei melungba nung lia aruogo, ajisüaka Tsüingrem taochi ajanga Pai asenok bushi aser tangbo asen state ya Khristan nütsüng timba aliba state ka kümogo," ta pai metetdaksü.

"Küm shia Nagaland Baptist Church Council-i May ita mezüingbuba hopta ya Nagaland Missions Movement (NMM)

week of prayer ta sangdong amonger. Asen missionary tem nungitsü aser mission mapa inyaksü atema mapangji Mission hopta kija masü saka iba mapang ya Tsüingremi Naga nunger dang aochiba, ajungba aser meimba bilemteta tenüsang agütsüba mapang ka südaksütsüla. Tatem maka Tekümtet tajangzük angurtemji asenok lir," ta pai metetdaksü.

"Tesüiba küm 50 tsüingda asenoki tenla tajung agütsüogo aser aika inyaktetogo, ajisüaka ano maneni asenok dang nungi tuluba akhanger, kechiyong asenok nem lenmang aisü nung moatsüogo. Mission atema anogo tenetnü sarasademtsü asoshi NMM-i Associations aser Arogotem dang mepishia metetdaksüogo," ta sangdong nung shia lir.

"Taküm asenoki mission week nung shilem agiba mapang nung alu tamen aruhtsü atema Tsüingremi aayangertem jenti alui yoktsü atema asenoki sarasademdi. Tang ama timtem mapang ka nung asenoki missionary tem aser parnok kibongtem atema-a sarasademtsüdi," ta sangdong nung shia lir.

"Asenoki metsüh prokbaji aintsü atema Tsüingrem dang sarasademdi. Tekümtet tajangzük angurtemi Tsüingrem tenyaba mapa nung shilem agitetsü atema sarasademdi. Tenyaba mapa ya tatem maka aser iba nung ya asenok shilem lir. Tenla agütsüba, sarasademba mesüra tenzükba nung asenoki langka nungbosa shilem agitetsü atema sarasademdi," ta paisa ayongzük.

ANO GO ABEN TSÜNGREM DEN

NAI AJIZÜKANG

"Kechiyong kechi koda nisung kati mangaba ajanga nisung aika temenen pur kümdaksür, aji oda kati tashi angaba ajanga aika temeshi pur kümdaksür" (Rom 5:19).

Tashi angaba aser mangaba agi asenok meketbanga lir, aser tashi mangaba küboki mela mela aier (Ef. 2:2). Tashi mangaba mangazüksü asoshi lemang tajungtibaji tashi angaa shirnoki jajar parnok nungi angazüker (Kol. 3:6-8).


Tejaklen shirnok mepet tulu kübok jaja parnok nungi asenoki angazüksü akok, Yisui tematiba tatishitsü lir (Ibri 12:11). Pa bushitsü aser mita alitsü asoshi asenok aja (Ibri 3:1-2). Yisui tashi angabaji tetsüingdai aitba ka masü saka Pa dak aketba jakla. Pai tasü tonga tashi anga. Pa taküm tetenzük nung tatem tashi tashi angabaji pa jakla liasü. Pai Tebu dang Yordan ayong nung, tatiitangba arem nung, Gethsemane Atsüki nung, Golgotha tenem nung aser ajaklen Pai tashi anga. Alima nung Pai tashi mangaba kecha nunga mangur. Khrista mulungsentsü nenok dak liang (Fil. 2:5,8). Asenoki teti tashi angadi (t.12).

Ibri 11 ji Tsüingrem Nungtuku Ki ta ajar. Ibai Tsüingrem dang tashi angar noksa agi sünga lir. Noai Tsüingrem dang tashi anga (Ibri 11:7). Abrahami Tsüingrem dang tashi anga aser pa akaba ajak toktsü (t.8). Yosefi tepuatsü anema tashi anga (t.22). Mosai jangratemtsü ajak toktsür Tsüingrem dang tashi anga (t.24). Danieli amokmeren anema Tsüingrem dang tashi anga. Nütsüngtemi rishikangshi tiyalung nung Tsüingrem dang tashi anga.

Mezüingpur tashi angabaji Laishiba nung dang Arogo otsü ajunga nung angur. Amy Carmichaeli (1867-1951) Tsüingrem tajaba nung tashi anga aser Indiai aru. William Careyi (1761-1834) Tsüingrem tajaba angaa India i aru. David Livingstonei (1813-1872) tashi anga Africa limai ao. Adoniram Judson (1788-1850) tashi anga Burma limai ao. Hudson Taylor (1832-1905) tashi anga Chinai ao. Sadhu Sundersingh (1889-1929) Osangtajung bener India ajunga nung senzü kechiaser pa nükjitungji tashi angatsüba liasü. Tashi manga asübo Mary Slessor i(1848-1915) nisung shi achirtem rongnung mapa inyaksü meshimtetla. Tsüingrem dang tashi anga Graham Staines i (1941-1999) pa taküm aser par chirtem taküm bendanga magütsüla. Tashi angaba agi tebuttsü Gladys Staines, pa arongdak yutsü. Item mezüingpurtemi asenok ajungshidaksüdi.

Oba, kü mulungjang Ne dang tashi angaba sünga alitsü Ne taochi kü nem kua. Amen.

Israel nunger Lag B'Omer benjung nung nisung 44 ajemset



April 30, 2021 nü Israel kübok Meron anasa Yihuda nunger benjung ka amongdang lendong ataloka nisung 44 ajemsetogo. Asürtem tasü mang anasa security sepaitem adenshia aliba noksa nung angur.

May 01, 2021: Israel nung Yihuda nunger benjungmong ka nung lokti tulu nungtepba lendong ataloka tajemba agi nisung 44 ajemset aser nisung aika yiruogo.

April 30, 2021 nü Galilee kübok Mount Meron anasa Lag B'Omer benjung amongdang iba lendong atalokba sülen Israel Ato kilonser, Benjamin Netanyahu-i asürtem atema mangyimer aser yirua alirtem atema sarasademtsür, ta metetdaksü.

Orthodox Yihuda nungeri Lag B'Omer benjung mapang nung mi tulu apor aonung piyong sarasademba den külemi ken tena

tsüingsangteper.

Tenük kuli alirtemi ashiba agi, coronavirus anema tekümdangtsü ka metetdaksüdang loktiji taoksa nung jentepba mapang nisung aika ajemset.

Police-i ashiba agibo, nisung kar lenmang temesü nungji ajuchir alangba mapang nisung aika alang, aser second ishika tsüingda nisung madak nisung alanga nisung aika ajemset.

Loudspeaker ajanga lokti dang pakshitsü metetdaksüji bomb lendong indang tekümdangtsü metetdaksür ta kari bilema liasü, ta nisung katibo metetdaksü.

Ketdangsertemi ashiba agi, coronavirus wara liaka lokti

tulu adenshi aser parnoki loktiji azüoktsü mekoki liasü.

Küm shia Yihuda nunger aika Meron nung adenshia Lag B'Omer benjung amonger, aser tesüiba kümtem dang nungibo tang nisung timba adenshia liasü.

Iba benjung amongtsü atema April 29 aonung nisung 100,000 (lakh 1) dak tema adenshia liasü, iba sülen April 30 nü nisung aika adenshi.

Yakümbo coronavirus wara prokba nokdangtsü atema iba benjung mapang tenokdangbatem liasü saka Israel nung coronavirus vaccination takok ngua agiba agi takümbo tenokdangba aika agiener liasü.

OLONG PAITEP # 5799

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|--|-------|-----------------------------|-------|
| TIPILEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemtdak | - (6) |
| 15. Tejen lai nung tesayur | - (5) | 12. ___ adenshi | - (4) |
| 16. Tsüngsak-mopung | - (5) | 14. Tsünusenbongtsü adokdak | - (3) |

OLONG PAITEP # 5798 TELANGZÜBA

- | | | |
|---|--|-----------------------------------|
| TIPILEN : | | LANGTSÜNGLEN : |
| 1. Awatsüng, 5. Aika, 6. Alulem, | | 1. Asang, 2. Ajunga, 3. Gado, |
| 8. Otsü, 9. Galil, 12. Atala, 14. Jila, | | 4. Mazük, 7. Meimtep, 10. Bangso, |
| 16. Pongzü, 17. Rone, 18. Rongrong. | | 11. Ajuru, 3. Azüng, 15. Aier. |

KOMA SÜLA TELANGZÜBA

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?

Aolima Arogo ajak nung Bible study ya kanga dang sentoka yuja lir anungji, Iba tensa majungba mapang online Bible study junga agitet nungbo Arogotem ajak nung laishiba dangi meyiba nung asentenshi tulu atoker asutsü yimlar.

-T.Imti Jamir

Yimlipilema kecha online tatongshi, asenok ajaki Tsüngrem dak temulong melemtetba kaji tat÷ Hongkong Market-i shopping atema metsübu i aor mesüra sen alemer ka asübo marendaki aotsü saka Yisu külemtsü aotsübo aikati tsübur taji mask, social distance hand sanitizer amshirbo kecha masü. Trust in God

- M.A.Ao 4th mile

Lai bushiba mapangji kanga junger. Onlineji dang masu pei kidanga azüngtsü mepishir.

-BEN AO

Online class dang masü local tv program dena amshi nung kanga ajungtsü, kechiyng akok tashi tena rongnung kabosa ki ajak nung alitsü imlar.

-SMS

AO OSHI ANGAZÜKDAK:
TANÜ ANGAZÜKTSÜBA OJANG



Chisang
(n) chipo nungi chi agitetba oset (rice spoon)
* Süng agi **chisang** kanga junga yanglur.

NAI-A YA METETTER MA?

- MAY 02 NÜ ASOR TONGTIBANG NISUNG KAR:**
- Catherine the Great, empress of Russia (1729)
 - Gen. Henry Robert, author of Robert's Rules of Order (1837)
 - Broadway composer Lorenz Hart (1895)
 - Singer/actor Theodore Bikel (1924)
 - Singer Engelbert Humperdinck - Arnold Dorsey (1936)
 - Activist/singer Bianca Jagger (1945)
 - Actor David Suchet (1946)
 - Pop singer Lesley Gore (1946)
 - Country singer Larry Gatlin (1948)
 - Actor Christine Baranski (1952)
 - Fashion designer Donatella Versace (1955)
 - Actor/former professional wrestler Dwayne "The Rock" Johnson (1972)
 - Soccer star David Beckham (1975)
 - Actor Ellie Kemper (1980)
 - Actor Robert Buckley (1981)
 - NASCAR driver Kyle Busch (1985)
 - Singer Lily Allen (1985)
 - Princess Charlotte of Cambridge (2015)

TANÜBO NAI LANGZÜANG

Q. Liquid Oxygen indang sentsü ji koma alir?

A.Blue Color B.Faded Blue Color
C.Faded Pink Color D. Pink color

=====(Taruba adok nung onoki langzüsü)

YASHI ADOK TELANGZÜBA : 2005

SUDOKU # 5842 TELANGZUBA # 5841

6				5	7	8		4	5	2				9	4	6			
	8			6	3	1	2		7			6	4	9	3	5	8		1
7				4					9				7				6		
	2	6		7		3						2					5		3
8	9						3				8	3				4			9
		5			1	2			7	6	4			9	6	3			
	7			3	4				6		7	5		6		9	1	8	2
				2		9	4	8							8	7	5		
4				1		6	7	2	5	9		8	5	4					6

OJANG LUTEP # 5385

- ENAS :
- ÜMDAMEKNGI :
- AKBINYA :
- NGAJAA :
- NGATARA :
- DONGLENI :
- TSIDAKÜR :
- MAA :
- NGJUA :
- SHINGTSÜSADALA :

OJANG LUTEP TELANGZÜBA # 5384

**TANG AMA TENSA TAMAJUNG DANG ASEN SASA
TALI KÜMDANGA ALITSÜ NÜNGDAKER**

TAN HOPTA ATEMA - KOMA SÜLA ?

Q.Asen lima nunga Covid-19 tashidak wara agi amokmeren tialong nung assembly election agi nunga koma süla ?



Kolkata, May 01, 2021: Amongnü West Bengal assembly election votes azüngtsü lia Honibarnü sepaitemi Kolkata nung vote azüngtsü tesem- Netaji Indoor Stadium anükba noksa nung angur.

Vaccine maliba agi state aikati arrshi 18-44 pur vaccination metenzüktet

New Delhi, May 01 (Agencies): May 1, 2021 nü India linük nung Covid-19 vaccination shilem tasembuba tenzükogo; iba shilem nung arrshi küm 18 nungi 44 purtem tashi nem vaccine agütsür, ajsüaka state aika nung vaccine peria maliba agi Honibarnü vaccination metenzüktet.

Honibarnü Covid-19 Vaccination shilem tasembuba metenzüktetba UTs aser state 11 ji: Jammu & Kashmir, Delhi, West Bengal, Punjab, Maharashtra, Tamil Nadu, Kerala, Karnataka, Andhra Pradesh, Puducherry aser Telangana state tem lir.

Jammu & Kashmir: Hokolbarnü J&K sorkari arrshi küm 18-44 purtem atema vaccination May 1 metenzüktettsü, saka vaccine peria anguba sülen ang tenzüksü, ta metetdaksü.

Delhi: Delhi Chief Minister, Arvind Kejriwal-i vaccination shilem tasembuba atema tang

tashi vaccine mangu, anungji May 1 nü Covid-19 vaccination metenzüktettsü, saka taruba anogo 2-3 tsüngda tenzüksü, ta metetdaksü.

West Bengal: Vaccine peria maliba nung ajemdaker West Bengal sorkaria arrshi 18-44 purtem atema Honibarnü vaccination metenzüktettsü, ta metetdaksü. West Bengal sorkari Centre dang state state nem tajemba agi vaccine dose crore 3 bosa agüjang ta mepishio.

Punjab: Punjab Chief Minister Amarinder Singh-ia, state nem vaccine supply tang tashi magütsü, anungji Honibarnü state nung vaccination metenzüktettsü, ta Hokolbarnü metetdaksü.

Maharashtra: Tan hopta tetenzüklen state health minister Rajesh Tope-i, vaccine dose peria malibayong Honibarnü vaccination shilem tasembuba metenzüktettsü saka arrshi küm 18-44 purtemi vaccine aliba yimti kar nung vaccine agütsü akok, ta metetdaksü

6) Tamil Nadu: Covid-19 vaccines- Covishield aser Covaxin supply osang mali, anungji May 1 nü vaccination shilem tasembuba metenzüktettsü; Tamil Nadu-i dose crore 1.5 meshiogo saka kwi angütsüar mejangja, ta state Health Secretary Dr J Radhakrishnan-i metetdaksü.

Kerala: Hokolbarnü Kerala Chief Minister, Pinarayi Vijayan-i, vaccine peria maliba agi sorkari telemtetba kecha magiteter, ta metetdaksü.

Karnataka: Karnataka Chief Minister, B S Yediyurappa-i, vaccine supply tang tashi mangur, anungji arrshi küm 18 ser temapurtem vaccination menor tenzüksü, ta metetdaksü.

Tanüngba states- Andhra Pradesh, Telangana aser Puducherry nung sorkartemia vaccine peria maliba agi arrshi küm 18-44 purtem atema vaccination metenzüktettsü, ta metetdaksü.

Centre sorkari SDRF nungi state tem nem sen cr. 8873 lemzüksüogo

New Delhi, May 01 (Agencies): 2021-22 küm atema State Disaster Response Fund (SDRF) nungi Centre shilem mezüngbuba instalment sen crore 8,873.6 state tem nem lemzüksüogo, ta Honibarnü Ministry of Finance-i metetdaksü.

Finance Ministry-i ashiba agi, Centre-i lemzüksüba sen nungi shilem 50- 4436.8 ji state temi coronavirus wara nokdangtsü atema amshitsü akok.

Ministry of Home Affairs-i benokba nung ajemdaker state

tem nem sen crore 8873.6 ji lemzüksüogo, ta Finance Ministry-isa metetdaksü.

"Shidakba agibo Finance Commission-i benokba nung ajemdaker SDRF nungi mezüngbuba instalment ji June ita nung ang lemzüksü. Teti inyaka aruba ama masü saka tangbo SDRF jelia agütsüogo, iba dak alia taoba financial year nung state tem nem agütsüba sen amshiba indang utilization certificate mata-i sen lemzüksüogo," ta parnokisa metetdaksü.

State temi SDRF nungi anguba senji Covid-19 nokdangtsü atema amshitsü, item rongnung hospital tem nung oxygen generation aser storage plants amenoktsü, ventilators, air purifiers aser ambulance services tajungba akümtsü, Covid-19 hospitals, Covid Care Centres amenoktsü, thermal scanners, personal protective equipment alitsü, testing laboratories amenoktsü, testing kits alitsü aser containment zone nung amshitsü densema lir.

Delhi HC-i Centre dang Delhi nem Oxygen Metric Ton 490 agüjang ta tuyu

New Delhi, May 01 (Agencies): Centre sorkari Delhi nem oxygen peria magütsüba atema Centre aija Honibarnü Delhi High Court-i Centre sorkar dang, tanüsa (May 1) Delhi nem oxygen metric ton 490 agüjang, ta tuyu.

Delhi high court-isa Centre sorkar dang, Delhi nem oxygen metric ton 490 ji tanüsa magütsüra nenok anema ken o benoktsü, ta metetdaksü.

Delhi nung aliba Batra Hospital nung oxygen peria maliba agi coronavirus agi shiranger nisung 11 asüba sülen Delhi High Court-i Centre dang, "Delhi nung nisungtem asüba agi onoki tenük agi mangu ama toktsütsü asü?," ta asüngdang.

Honibarnü Batra Hospital nung oxygen peria maliba agi doctor ka (Gastroenterology department nung HOD) ka densema coronavirus tashidak agi shiranger 11 süogo. Hopta ka tsüngda tang agi tanabenbuba iba hospital nung oxygen atemer.

Tuyuba ama Delhi nem oxygen peria agütsütsü, iba tetuyubaji onoki magientsü, ta shia Court-i centre dang, "Tzü

agi tekolak adena atuogo, anungji tuyuba ama inyaksüla," ta metetdaksü.

Delhi High court-isa, Delhi nem sorkari oxygen lemzüksüogo, anungji lemzüksüba amaji shidak agütsütsü, ta metetdaksü.

Taoba hopta Delhi nung aliba Hospital aikati hospital nung oxygen peria mali, ta shia Centre sorkar dang nungi teyari meshia liasü.

Delhi sorkaria, takümtem kümzüksü atema yimti nem lemzükja aliba ama oxygen peria magütsür, ta aiben jembia arudar.

Hokolbarnü Deputy Chief Minister, Manish Sisodia-i, tang tashi linük yimtiba nung oxygen agi kanga anünger, aser anogo shia timtem kanga ajurur, ta metetdaksü.

Brihostibarnü Delhi High Court-i Centre sorkar dang, Madhya Pradesh aser Maharashtra na nembo parnoki oxygen meshiba dang nungi tali agütsüogo, ajsüaka Delhi nung AAP sorkari meshiba ama kechiba Delhi nembo oxygen peria magütsür, ta asüngdanga liasü.



Nadia, May 01, 2021: Honibarnü May Day (Labour Day) anogomong nung Nadia yimti tezülen aliba lungro yangluba tesem ka nung aayangertem mapa inyakba noksa nung angur.

India nung ano nisung lakh 4 dak Covid putet aser 3,523 asü

New Delhi, May 01 (Agencies): India nung tang mezüng anogo ka kija nung nisung lakh 4 tema dak coronavirus tashidak putetogo aser ano maneni iba tashidak agi nisung 3,523 süogo; tang linük nung iba tashidak agi teshirangdakupur lakh 32 jungogo, ta Honibarnü Union Health Ministry data ajanga metetdaksü.

Linük nung ano nisung 4,01,993 dak coronavirus putetogo aser tang tashi nung coronavirus case ajak agibo 1,91,64,969 jungogo; tesüiba ghonda 24 tsüngda iba tashidak agi nisung 3,523 asüba densemabo linük nung iba tashidak agi asür ajak agi

2,11,853 jungogo, ta Honibarnep 8:00 ako nung Health Ministry-i metetdaksü.

Tang India linük nung iba tashidak agi teshirangdakupur 32,68,710 lir, aser ibaji coronavirus caseload nungi shilem 17.06 lir.

India nung coronavirus tashidak agi shiranger 1,56,84,406 anepogo aser iba tashidak agi shiranger asüba shilemji 1.11 lir.

Honibarnü Indian Council of Medical Research (ICMR)-i, April 30, 2021 tashi nung linük nung samples ajak agi 28,83,37,385 tendangogo aser iba nungji Hokolbarnü samples 19,45,299 tendangba densema lir, ta metetdaksü.



Ahmedabad, May 01, 2021: May 1 nü India nung arrshi küm 18 nungi 44 purtem nem vaccine agütsü tenzükba anogo nung Ahmedabad nung aliba vaccination center ka nung vaccine agütsü atema lanurtem tarensena nokdaka aliba noksa nung angur.



Honibarnü Myanmar nung yimti tulutiba Yangon nung junta tem tashi mangai nüburtemi democracy benoktsü khanga yimtong süa longkak aitiba sentong ayongzüka agiogo. Noksa nung nüburtemi military anema longka aita senzüba angur.

China-i India atema oxygen generator 40,000 renemtsüdar

Beijing, Monupii/May 1 (Agencies): India-i oxygen generators 40,000 order asüba mapang shidak nung agütsütsü atema China nunger company temi tanen makai inyakdar, ta ambassador Sun Weidong-i ashiba den lokti tentet aikati India nem teyari agütsütsü atema private channel tem amshidar, ta ashi.

"India-i order asüba oxygen generator 40,000 yanglutsütsü atema China nunger company tem inyakdar aser takok tashi tekaratiba nung agütsütsü atema tanen makai inyakdar. China nunger company aser jurila lokti tentettemia parnok sasep nung India nem teyari agütsüdar," ta India dangi Chinese ambassador Sun-i Global Times dang ashi.

April ita China-i India nem ventilators 5,000 dak tema, 21,569 oxygen generator, mask million 21 dak tema aser mozü ton 3,800 shi agütsüogo, ta Sun-i ashi.

Hokolbarnü China tir Xi

Jinping-i Ato Kilonser Narendra Modi den asükhü lemsatepogo aser ashiba agi, kidanger aser partner ama China-i India nung timtem tulu ataloker aliba angateter aser takokba tashi teyari agütsütsü renema lir.

Hokolbarnüsa Chinese official media-i ashiba agi, state councilor aser foreign minister Wang Yi-i telephone ajanga external affairs minister, S Jaishankar den sensaksemogo aser iba mapang pai India nung Covid-19 tashidak kanga kara prokshia aoba China-i shisabulua bilemer ta shiogo.

Wang-isa, India tenüngdakba apir jenjang kar agitsü mulunga lir ta ashi: "Mezüngbuba nung anti-epidemic material tem yanglutsü aser agütsütsü atema China-i Chinese enterprise tem ajungmesotsü aser nungita yaritsü. Tanabuba nung India-i alizükba anti-epidemic material tem belenshitsü aser custom clearance atema teyari

agütsütsü. Tasembuba nung wara den raratsü atema shisatsü lemsateptsü asoshi linük ana tsüngda health aser wara nokdangtsü atema inyaktepba mongintem tsüngda video lemsateptsü asoshi China-i achayangtsü," ta pai ashi.

Paisa, China-i India pusemer aser tenüngdakba osettem ajak memeno India dangi yoktsü ta ashi.

Osetem India-i beneler yoktsü atema China nunger company tem nem teyari agütsütsü aser oset belenshiberaba nung kecha tetsükdaktsü madokdaktsütsü atema airport, customs aser airlines tem nem tetuyuba agütsütsü, ta pai ashi.

Kasa mapang nung Jaishankar-ia, Xi-i Modi den asükhü lemsatepba atema pelaba lemsatepba den China-i anti-epidemic osettem alizükba nung teyari tulu agütsüba atema kanga pelaba lemsatepogo.

Nepal sorkari India den sendaktepa entry points 22 shibangtsü

Katmandu, Monupii/May 1 (Agencies): India nung Covid-19 tashidak kanga kara prokshia aoba mapang ka nung Nepal sorkari India den sendaktepba tesem 22 shibangtsü telemtetba agiogo. Covid Crisis Management

Coordination Committee (CCMC)-i Hokolbarnü Council of Ministers dang Nepal aser India na sendaktepba arrtsü nung tesem 35 aliba nungi 22 shibanga atatsü atema tetuyuba agütsüba sülen iba telemtetba agia liasü.

India aser Nepal na sendakteptsü atema arrtsü nung point 13 lapoka ayutsü.

India nung anogoshia nisung lakh 4 shi dak coronavirus tashidak poteta arudar aser Honibarnü Union Health Ministry sangdong ka ajanga ashiba agi, tang tashi nung nisung 2,11,853 süogo.

Honibarnü nisung 4,01,993 dak tashidak potetba sülen India nung nisung 1,91,64,969 dak tashidak menaogo aser nisung lakh 32 tang temang anepaludar.

Nepal nunga tang tashi nung Covid-19 tashidak nisung 323,187 dak menaogo aser nisung 3,279 süogo, ajisüaka tashidak kanga kara prokshia odar.

Nepal nung Brestibar aser Hokolbarnü nisung 5,000 tema dak tashidak potetba sangdongogo.



Lebanon kübok Litani ayong nung awatsüng ka kümbang nung ango tasü aponggeta adokba noksa nung angur. Qaraoun awatsüng kanga menenba ajanga angotem asü. Activist temi küm aika sewage aser jana agi ayong memenentsütsü tekümdaktsü metetdakja aruogo.

United States sepaitem Afghanistan nungi anien tenzükogo

Kabul, Monupii/May 1 (Agencies): United States-i Honibarnü nungi Afghanistan nung aliba sepaitem anien tenzükogo, aser iba ajanga US asoshi rara talangtiba tatembang ka dangi bener arutsüogo. Ajisüaka iba ajanga Taliban-i amokbanger aliba linük asoshi tarutsü mejangjai kümogo.

US ketdangsurtemi ashiba agi, sepaitem anienba maparen ya tenzükatokogo aser May 1 nü sepaitem anienba ya iba sentong nung shilem ka dang lir, saka Washington-i iba anogo indang sangdongogo, kechiyong 2020 küm Taliba den tenangzüktepba yanglur aliba nung iba anogo tashi nungbo sepaitem anientsü mulungteper lir.

Sepaitem kidangi meyipa aotsü renemtepba mapang Kabul aser Bagram airbase nung US helicopter tem inyaksangshi taliba akümba ajangshiogo, ta osang ajanga metetdaktsü.

Yimjung asoshi ken o ka tembanga jembishinü mesütetba ajanga linük nung maneni mepet mesü adoker aliba mapang ka nung küm 20 sülen US sepaitem atsünginer.

Hokolbarnü Pul-e-Alam nung gari nung bomb inoker pokdaktsü lendong ka nung nisung 21 asü aser nisung 100 dak tema yiruogo aser iba ajanga linük tia kanga jangja sayur.

US tir Joe Biden shibai Afghanistan nung rara ya "the forever war" ta ajar, pai taoba ita America nunger sepai 2,500 ya September 11 nü US amakba sülen küm 20 ajungba anogo tashi nungbo anienadoker alitsü ta sangdongogo.

"Küm 20 tejakdang lendong tulu atalokogo... 2021 küm tashi nung iba tesem maitsü alitsüji rasaa ashitsü makok," ta pai ashi.

US sepaitem anintsü atema nangzüktepba sülen Taliban-i bendanger sepaitem den rara memenai arudar, saka kiralongrartemi linük nung yimdakyimtsüngtem nung sorkar sepaitem taochi makai maka arudar aser iba den jila aser yimti balala nunga timtem lendong bener arutsüdar.

US nunger sepaitemi Afghanistan toktsür aoba ajanga Afghan nungertem tsübuteper.

"Taliban-i linük amokbanger aliba tia kati tanaben aitsü ta ajaki tsümbua bilemer," ta Kabul nung pri-

vate radio station ka nung inyaker Mena Nowrozi-i ashi. "Taliban pur kasa dang; parnok memelenshi. US-i küm ana shibo linük maitsütsü asü," ta lai AFP dang ashi.

Afghan tir Ashraf Ghani-i, Taliba den rara timba linük sepaitemi raraan aruogo aser telungpurtem azüoktsü atema parnok ket nung tashi lir, ta ashi.

Paisa, US sepaitemi linük toktsür aoba tetezü Taliban pur raratsü atema kuli kecha makai akümtsü.

"Nenoki shirnok tepseter? Nenoki kecha raksar? Nenok bendanger den rara tembango," ta Ghani-i iba hopta ashi.

Ajisüaka US joint chiefs of staff mendenbuba general Mark Milley-i, timtem lendong tulu adoktsü akok ta shiogo.

"Tia makara sorkar chireptsü aser military chireptsü akok," ta pai iba hopta ashi.

"Linük nung civil wara adoka lir aser iba den meimchir temeden dak sendakba nung timtem lendong tulu lir," ta paisa ashi.

Taoba mapang Kandahar insurgent bastion nung Police officer Abdul Malik-i ashiba agi, parnok renema lir.

"Onoki ozü lima anepalutsüla. Ozü litsü kümzüka ayutsü atema onoki takok tashi inyaktsü," ta pai AFP dang ashi.

September 11 nü US amakba sülen 2001 küm October ita nungi tenzüka US-i anir sepaitemi Afghanistan nung Taliban den rara aruogo.

America nunger 2,400 shi aser Afghan nunger meyirejang aika asüba sülen Biden-i, iba linük ya anüolen aliba linük anema nokdaktsü atema bendanger jihadist tem tamendakdak ka mekümtetsü ta US sepaitemi jangjatsüba sülen atsünginer, ta ashi.

Kasa mapang nung Taliban puri par linük toktsür oya aliba US sepaitem amaktsü akok ta tsümbua bilemer aser Kandahar province, kong mapang shia mangatettep adoka aruogo iba tesem nung telungpurtemi tesem aika nung explosives tokja lir, ta security source-i ashi.

International Crisis Group nungi Andrew Watkins-i ashiba agi, taruba itatem nung tensa ya local tsüngda mangatettep ka akümtsü.

Qualcomm-i India nem Covid-19 atema sen cr. 29 dak tema tenlatsü

New Delhi, Monupii/May 01, 2021 (Agencies): Linük nung Covid-19 tensa kanga mejungi küma aoba ajanga tesüiba ghonda 24 tsüngda nisung lakh 4 dak tema iba tashidak tasen putetogo. Tang India nung Covid-19 wara tanaben adokba ya taoba küm dang nung kanga agi tesashiba lir.

Iba den külemi, tesuiba hopta ishika nungi India nung iba wara agi anogoshia nisung 3,500 dak tema asüba osangtem ajanga angazükdaki. Iba mapang alima tesem balala aser linük nungi nija aikati Covid-19 anema raraba mapatong pusema tenla tajung agutsüdar.

Kasa mapatong pusema, tang, America indang chip' yangluba company Qualcomm-i India nem million dollar 4 (sen cr. 29.6) tenla agütsütsü sangdongogo. Iba sen ya linük

nung medical aser Healthcare rondak maparen nungittsü asoshi amshitsü.

"Anogoshia iba linük (India) nung Covid-19 tensa osang angazükdang onok kanga aoksar, temulung züreper aser iba den külemi India ya pei lima ama bilema alir külem inyakertem aser medemertem densema iba linük nung alir nüburtem asoshi onoki aria bilemetsür," ta company sangdong ka ajanga metetdaksü.

Qualcomm-i ashiba agi, charity maparen ajanga India nung alirtem nem teyari yoktsü asoshi onoki asalentong yanglua liasü.

'Indian Healthcare System' nung medical supply aser taküm ka kumzükba (oxygen) osettsüset peria maliba timtem agi rokongba onoki asadanteter, ta company-i ashi. Qualcomm-i ashiba agi,

Qualcomm Charitable Foundation aser Qualcomm India Private Limited ajanga India nem million dollar 4 million (sen cr. 29.6) agütsütsü nangzük; aser linük nung Covid-19 anema raraba maparen tsütsü medical wadang nungittsü asoshi iba sen amshitsü.

"Alima ajunga asungba Covid-19 wara ajanga maparen aisü nung ongdang tulu adokdaksüogo. Iba den külemi longjemer kati ka nungita inyaksü asoshi kanga tasak kümogo. Mapang shitak nung teyari agüja nungitba ajanga India nung nüburtemi iba wara koktetsü ta onoki imlar. Iba tensa tamajung ajangettsü aser ajak kumzükba yutsütsü asoshi onoki külem inyakertem, tesendaktep telok, Sorkar aser lokti balala maneni nungita yaritsü terenemba lir," ta Qualcomm-i ashi.

Dell-i Latitude 7320 laptop saya

New Delhi, Monupii/May 01, 2021 (Agencies): Dell-i brand indang Latitude series nung Dell Latitude 7320 Detachable 2-in-1 laptop bendenlokba sangdongogo. Iba device nung detachable screen angutsü aser ibaji ajanga laptop ya tablet ka ama amshitetsü.

Company-i ashiba agi, Latitude 7320 Detachable ya laptop rongnung tepungbaba aser tilaba alitsü, kong MIL-STD lir. 11th-generation Intel Core i7 CPU den 16GB RAM ajanga iba laptop maparen achaayangtsür.

Dell Latitude 7320 Detachable jentang \$1,549 (sen lakh 1.15) alitsü aser India nunga iba laptop yakta sayatsü imlar.

Design tsütsü reprangdangra, Dell Latitude 7320 Detachable nung 13-inch full-HD+ (1,920x1,280 pixels) display ka angutsü aser display

yagi 500 nits peak brightness support asür. Tekumzüksü atema display ya Corning Gorilla Glass DX agi meyibangja lir.

Tenük nung timtem magütsütsü atema, iba screen panel nung ComfortView Plus tech - built-in low blue light solution inoka yanglutsüogo.

Dell-i ashiba agi, tzi mopung merüka ayutsü atema iba two-in-one Dell Latitude 7320 Detachable nung VOC waterborne paint amshia lir. Iba laptop ya sentsü ka -Grey colour variant nung dang angutsü. Laptop tejaklen 5-megapixel webcam ka angutsü aser 8-megapixel camera ka dena lir, iba webcam yagi video tem 1080p resolution nung tangoktetter.

Dell Latitude 7320 Detachable telung nung 11th-generation Intel Core i7-1180G7 CPU den integrated Intel Iris graphics, 16 GB

LPDDR4X RAM aser 512GB PCIe NVMe Class 35 SSD storage inoka yanglutsüogo. Iba device indang operating system ji Windows 10 alitsü, ajisüaka, talirtemi pro mesüra enterprise version shimtetsü akok. Iba den külemi laptop yahi ExpressSign-in support asütsü.

Connectivity tsütsü reprangdangra, Dell Latitude 7320 Detachable nung Wi-Fi 6, Bluetooth v5.1, optional mobile broadband den Qualcomm Snapdragon X20 chipsets, Thunderbolt 4 ports, audio jack aser optional touch fingerprint reader angutsü. Latitude nung battery tasazük 40Whr battery lir aser ExpressCharge 2.0 support angutsü.

Dell-i ashiba agi, iba inbuilt ExpressCharge Boost yagi minute 20 nung battery shilem 35 aser ghonda ka nung battery shilem 80 tashi charge sütsür.

Actor Bikramjeet Covid-19 agi asü



Bikramjeet Kanwarpal (File photo)

Mumbai, Monupii/May 01, 2021 (Agencies): Film aser television nung ajaki jangjaa aliba actor Bikramjeet Kanwarpal alima nungi pilaogo. Hokolbarnü actor Bikramjeet ya Covid-19 dak sendakba timtem ajanga asü. Pa arishi küm 52 liasü, ta sangdong ka ajanga metetdaksü.

Taoba mapang Army officer, Bikramjeet-i nungtugu film, TV shows aser web series aika nung shilem agiogo. Pa asüba osang angashia Film

yanglur Ashoke Pandit-i Twitter sabang ajanga mangyim jashi lemsatepogo.

"Tanep, Major Bikramjeet Kanwarpal Covid-19 agi asü ta osang angazüka aoksar aser mulung züreper. Army officer mapa nungi anensang Kanwarpal-i film aser television project aika nung supporting actor ama shilem agiogo. Tang amala mapang, asür Kanwarpal-i toktsür aoba adianu, kinunger aser medemer tem den asükhü lemsateper," ta pai metetdaksü.

Bollywood photographer Viral Bhayani-ia Bikramjeet asüba osang angazüka mangyim jashi lemsatepa liasü, kong pai lemsatep olen nung tongtibang nisung aikati asükhü lemsatepogo.

Actress Kishwer Merchant-i Twitter ajanga, "Kanga dang

jashir, pai toktsür aoba adianu aser kinunger mulung nung tesünep aser tashi agüjangma ta sarasademtsür," ta lemsatep.

Siddhanth Kapoor-ia, "Tanep 6:55 ako meta, pa iba akümüli nungi pila oadok, pa ama nisung tajung ka asenok nungi pila aoba ya tesasatsüka! Kangasa jashiseter, pa tanela nem anisüngzük agüjangma," ta lemsatepogo.

Maneni, Actor Neil Nitin Mukesh-i, "Kanga dang tejashitsü osang. Küm aika ni Major Bikramjeet den medema aru. Film aika nung pa den külemi inyakogo. Bypass Road nung tesüsa külemi shilem agiba bilemteter.

Tangar ajungmesotsü asoshi sempet tajung aketba nisung ka liasü, pa teti menungra bilemtetsü," ta lemsatepa liasü.

PELABA LEMSATEPER

Ozüi teti meima aliba tsürabur **Tajungchuba Imsong** (Longmisa), shirangba anogo nungi ali wadang tempangba anogo tashi kija kibong aser lokti shirnokisa nübu, rongsen aser sarasadem ajanga yaritepogo, nenok ajak dang kangasa pelar. Tsüngrem Tajungsangi nenok ajak moajangma.

- **Chirnur, semchisemnur**
aser kinungertem



Tasoba: 1930
Tasüba: April 27, 2021

MENUNGRA BILEMTETER

LT. N. KIKA. PONGEN

Asüba anogo: 02/05/2011

Temeim Oba, na akümüli wadang temer kodanga meshilangtsüba limai oadoker küm 10 (Ten) abensa arudang, ne temeim mapatem, jembishinü aser pela dang onok den aliba to onoki mamateter.

Minute ka danga na amatsü makoker, temulungjang tenük agi na angur saka asangsang nung na mali. Na malibaji kecha agia melentsü makoker.

Tanü na onok den meliaka nai sayubentsüba aser mapa tajungtem onok mulungjang nung teti alir.

- **Temeim kinungtsü, jala,**
anükapang aser kinungertem



TATOK MESHIR

Ni, Ms. BENDANGKUMLA LANGU, Shri ARINIBA er jala Lirnen Yim nungi, SHRI I.SHILU YADEN, Merangkong, indang Notun Bosti, Sema Khel, Dimapur Ali Patta pai memeteti, teyazu yanglua ameshi aser aji ni tai ta I.Shilu Yaden aser par kibong dang tatok meshir.


(BENDANGKUMLA LANGU)
Supply Colony, Dimapur
Nagaland

IN THE COURT OF
PRINCIPAL DISTRICT & SESSIONS JUDGE
MOKOKCHUNG : NAGALAND

S/C NO. 35/2021

NOTICE

**NOTICE INVITING CLAIMS/OBJECTIONS OF OTHER CLAIMANT(S)
FOR ISSUE OF SUCCESSION CERTIFICATE UNDER PART-I OF INDIAN
SUCCESSION ACT 1925.**

Whereas application under Succession Act 1925 for grant of Succession Certificate for the estate/pension benefits of Late Aameren

has been applied by Shri/Smti Leinjensangha

W/O. At. Aameren R/O H.No. 93, Changjongya, Village

Dimapur, Nagaland for possession of:

① Family Pension
P.P.O. No. NLS/24296

② Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 16.05.2021

Given under the hand and seal of the court on this the 16.05.2021

Principal District & Sessions Judge
Mokokchung, Nagaland

ALI AYOKER

Indisen Village

15,755 Sq.ft.

Contact: 9862713420

Kane-i SRH captain mapa Warner nungi melenzük

New Delhi, Monupii/May 01, 2021 (Agencies): Tang India tesem balala nung asaya aliba Indian Premier League 2021 tanüingba asayatem atema SunRisers Hyderabad (SRH)-i parnok indang captain tassenba ama New Zealand nung Kane Williamson shimogo.

Tang season tenzüker mezüing SRH pur mezüing asaya trok nung Australia nung David Warner-i anir asayaogo. Warner lenisüba kübok SunRisers Hyderabad pur kanga mejungi asaya tenzüker, kong asaya trok nungi asaya pungo tashi par telok tamakok ngua lir.

"Taruba asayanü (Deobar) nungi tenzüka aser tanüingba IPL 2021 asaya shilem ajak atema SunRisers Hyderabad captain ama Kane Williamson-i maparen ketdang asütsü," ta Honibarnü SRH sangdong ka ajanga metetdaksü.

Deobarnü, Delhi nung SunRisers Hyderabad puri Rajasthan Royals telok den asayatsü renema lir.

"Asüing (Deobar) Rajasthan Royals pur den asaya atema SRH nung bendanger

asayatem melentsü asoshi team management-i telemtetba agiogo," ta kasa sangdong nung shia lir.

"Iba telemtetba (SRH captain melena) ya kanga junga asadangshir sülen agir, kechiyong tesüiba küm ishika nungi iba franchise (SRH) atema David Warner-i shilem tulu agiba ajaki jangjaa lir aser iba maparen atema team management-i pa akhümtsübur. Ano tan season tanüingba asayatem nung shisatsü aser asaya tsütsü team pur takok asoshi Dravid-i maneni nungita yaritsü onok teimla lir," ta team-i lemsatap.

Team nung külem asayatem dak alaka, imlaa ataba ama David Warner indang batting tsütsü team pur nungittsüsa pai kangarabo shilem tajung magitet. Iba season nung SRH pur asaya trok nungi abilen batting noktaksang Warner-i run 193 dang yanglua lir aser item asaya nung pa indang strike rate ji 110.28 dang alitsü.

Bodhbarnü (20.04.2021) SRH pur Chennai Super Kings den tesüsa asayaogo. Iba asaya nung Warner-i ball 55 nung run

57 dang yangluteta liasü. Iba asaya CSK-i wicket 7 agi SRH madak takok angu.

Iba asaya nung Warner-i run 57, Manish Pandey-i ball 46 run 61 aser Kane Williamson-i ball 10 nung run 26 yangluba ajanga SRH puri run 171 yanglutet aser parnok rongnung asayar 3 out süadok. CSK puri over 18.3 nung iba asaya koktet.

"Ni batting junga masayatetba ya kü tashimait ajanga lir aser ibaji kü khuret dang. Ni kanga melungi asaya aser run angutsüsa ball dak mezüktet," ta asaya temer sülen Warner-i ashi.

"Manish-i kanga junga batting asaya aser pai iba ama kodanga asayadanga mali. Kane aser Kedar (Jadhav, shibai ball 4 nung run 12 yanglua liasü) nungeri team kanga nungita asayaogo, saka asaya tatem nungbo ajaki kü teblemstü ka akümer," ta pai ashi.

"Shot tajung kar fielder ket tongera iba jagi bilemba ama innings tepor junga maouer. Iba den külemi ni run yanglutsü atema ball aika agia asaya," ta David-i shisem.

Pranati -i Tokyo Olympics nung tokteptsü renema lir

New Delhi, Monupii/May 01, 2021 (Agencies): India tsür gymnast, Pranati Nayak, shibai 2019 küm Asian Artistic Gymnastic Championships - vault asayamung nung bronze medal takok angu, continental quota ajanga qualify asüba sülen, lai Tokyo Olympics nung asayatsü terenemba lir.

West Bengal nungi arishi küm 26 tain Nayak ya Asian quota atema Sri Lanka tsür Elpitiya Badalge Dona Milka Geh sülen tanabuba alitsü aser 9buba Senior Asian Championships athiba sülen iba zone nungi tokteptsü la temsüa aküm.

Iba asayamung ya May 29 nungi June 01, 2021 tashi Hangzhou, China nung asayatsü renem, saka Covid-19 tensa mejungi aoba ajanga iba Championship thitsü.

"2019 World Championship mapang qualifying round nung point mengutetba atema ni ka jashia liasü aser alima ajanga asüingba Covid-19 wara ajanga asayamung ajak thinena aruba mapang, Olympics nung shilem agitettsü maangka angutsü ta bilema meliasü," ta Pranati-i ashi.

"Iba dak sendakba nung




Asian mesüra International tentet nungi official osang atadar," ta lai shisem.

Pranati indang taoba coach Minara Begum, shiba 2019 küm Sports Authority of India (SAI) nung anena liasü, lai Olympic quota ajangzükteba osang angazüka pelaba lemsatepa liasü.

"Mongolia nung Asian asayamung aser Germany nung World Championship nung toktepta sülen lai point ajangzükteba tem bener lia, China nung asayamung thitsüba sülen, lai Asian quota angu," ta Begum-i ashi.

Ulaanbaatar nung Pranati-i bronze medal takok anguba sülen, 2019 world championships nung shilem tajung agia lai Olympics atema qualify asütsü teimla tulu ayu.

Marquez kanga mejungi tsükok saka maneni asayatsü



Jerez De La Frontera (Spain), Monupii/May 01, 2021 (Agencies): Honibarnü, Jerez tesem nung Spanish MotoGP renemshiba (practice) mapang, Spain nung trokben 'world champion' Marc Marquez kanga mejungi tsükokba sülen, tiaka yiruyibong tulu nungi jenbo aser pa maneni racing nung shilem agitsü.

"Pa temang tendanger sülen, tanüingba SpanishGP nung marcmarquez93-i asayatetsü," ta Twitter ajanga Honda team-i metetdaksü.

Iba circuit nung tasembuba practice session agiba mapang arishi küm 28 tain Marquez ya pai aniba Honda motorcycle nung tsükok. Taoba küm-a Marquez-i pa indang 2020 campaign tembangba race tetenzük nung shilem agiba mapang pa tsükok aser teka achjilen raksa.

"Marc tajungba lir," ta

MotoGP doctor Angel Charte-i osang jangjatsüogo.

Taoba küm Marquez teka raksar ita tuku tashi surgery agilen senzüa anepalua aruba sülen, taoba ita Portuguese MotoGP nung pa shilem agia liasü.

Hokolbarnü, Jerez kübok practice session nung shilem agir sülen, Marquez-i pa temang nung tashimaitba/lula aoba metetdaksü.

Honibarnü, practice session tenzüker Marquez-i pa amenba motorcycle ya 180 kilometer tashi kara aniba mapang, track indang 'lungku tenetbuba' - 'turn seven' nung pai motorcycle mazüokteti lenmang tezülen ajua ao. Idangji lenmang tezülen toka aliba lung tetsüksa ma nung ajua orr barrier ka nung tsükok.

Ajisüaka, Marquez-i noktaka jajetet aser aser scooter ka nung mener pa ayamesoba pit tashi meyipa ao.

Iba track nung Marquez ya temang reprangdaksüba sülen, Honda-i, pa temang shilem kar nung terara merzükba dak alaka kanga mejungibo yirua mali, ta osang agitsü.

Tatsüka dang lir, Twitter ajanga Honda team-i, "Turn 7 nung tsükokba sülen, pa

temang junga tendangtsü asoshi @MarcMarquez93 ya mozüki anir odor," ta lemsatap.

"Tekümdangtsü mera agitsü asoshi onoki pa mozüki anir ao aser Marquez temang nung ayangashi mesüra timtemba kecha mali," ta team-i ashi.

Charte-i ashiba agi, temang tendangtsü atema pa temang scan asütsü tetuyuba agitsü.

"Pa (Marquez) tekong aser terongdong merzüka lir. Iba dak alaka scan nung teret/tezü raksaba kecha mesayu. Tekümdangtsü atema onoki pa temang scan asü," ta doctor-i ashi.

Qatar nung 2021 indang mezüing race ana nung shilem magiba sülen, April 18 nü Portugal nung Marquez-i asaya liasü. Iba race nung pai jenjang tenetbuba ajangzükteba.

Hokolbarnü, Jerez kübok practice session ana nung Marquez-i jenjang 16buba nungang tembang.

Kasa practice session tasembuba sülen, mapang atakzükja aliba nung Honda indang satellite LCR team atema shilem agisang Takaaki Nakagami-i Yamaha indang championship nung temaba - Fabio Quartararo ajatetogo.

India aser New Zealand asayatsü

2021-22 FIH PRO LEAGUE

Bengaluru, Monupii/May 01, 2021 (Agencies): Sangküm (2022) February 05 nü tasembuba FIH Pro League nung India tebur hockey team-i parnok indang campaign tenzüka New Zealand tebur hockey team den asayatsü terenemba lir.

Iba nungtugu asayamung dak sendakba nung international hockey tentet - FIH ajanga asaya indang schedule sayago.

February ita India-isa Australia aser Spain den asayatsü kechiyong par teloki (India) linük nung Germany aser Argentina na den masayadang kasa ita bendanglen asaya pungo tashi asayatsü lir.

Black Sticks (New Zealand), pur den asayaba sülen, Spain (Feb 26 aser 27) den masayadang February 12 aser 13 nü India-i Australia den asayatsü.

Item asaya temer, linük nung India-i Germany (March 12, 13) aser Argentina (March 19, 20) den asayatsü.

Ano India nungsa April 2 aser 3, 2022 nü India team-i England den asayatsü. Iba asaya temer 2022 season nung, bendanglen June 11 aser 12 nü Belgium aser June 18 aser 19 anogo Netherlands den

asayatsü.

"Iba schedule ajanga onok asalentongten jelia renemshitsü asoshi maangka tulu agitsü. Taküm July ita Tokyo Olympics nung junga asaya takok angutsü nükjidong yur onoki sentong yangludaki. Ajisüaka tanabuba küm tesadang nung onoki nungdakba teinyaktsü tem junga meteta arur," ta India skipper Manpreet Singh-i ashi.

"New Zealand aser Australia naprongla team tajung lir aser iba asayamung nung onok campaign tenzüka parnok den asayatsü maangka anguba asoshi pelar aser yongyaseter," ta pai shisem.

India chief coach Graham Reid-i ashiba agi, alima nung team tajungtiba (hockey team tem) den asayatsü asoshi team renema lir.

"2022 February ita iba title atema tokteptsü asoshi, campaign tenzüka New Zealand aser Australia na den asayatsü sentong lir. Teti nunga item team den onoki kanga toktepa asayar aser iba asaya atema sangküm ji iba mapang tetemjen asütsü akok," ta Reid-i ashi.

FIH Pro League indang season tanabuba (2020-21) ya tan ita tatemlen India-i Spain aser Germany na den asayatsü terenemba lir.

BILEMDANGANG

"Temoatsü mesüra timtemji ayimdena marur."